



Sabtu, 24 Agustus 2024

Ogen : Kejadin 24:22-23



Mejinkat



Nimbai lau enda semal ilakoken sekalak singuda-nguda i bas cerita Alkitab. Zipora singuda-nguda Midian nimbai lau guna asuh-asuhen bapana, i je me perjumpanna ras Musa. Diberu Samaria pe nimba lau ku sumur jam 12 ciger, i je ka nge perjumpanna ras Jesus. Ribka pe ras diberu-diberu sideban ku sumur nandangi ben guna nimbai lau man babanna ku rumah. I je ka me perjumpaan Ribka ras Elieser budak Abraham. Tupung Ribka seh i sumur e, iperkuanken Elieser ia janah mindo gelah itimbana lau man inemenna. Minter itimba Ribka lau e janah iberekenna man Elieser. Aminna pe la ipindo Elieser, minter ka itimbai Ribka lau bas sumur nari man asuh-asuhen Elieser. Puas kerina asuh-asuhen ndai minem. La kal pertewas Ribka enda, si la ipindo pe tapi ietehna e man sampaten, isampatina. Labo tupung isuruh entah si ipindo ngenca ilakokenna. Mejingkat, enda me salah sada biak si lit i bas ia. Nggit ia nampati aminna lau si man baban ku rumahna lenga i taruhkenna. Ipelebena keperluan kalak sideban asangkan keperluan keluargana. Labo sekali ngenca itimbana lau e, tapi piga-piga kali, labo ia jungut-jungut ndahikensa entah bagi si terpaksa. Malem kal ate Elieser natap ras ngidah perbahanen Ribka. E maka alu sinik-sinik iperdiatekenna kai si itotokenna man Tuhan, janah sue kai si ipindokenna ras kai si iinanamina. Lanai ia sangsi, em singuda-nguda si ituduhkan Tuhan jadi teman geluh Isak, anak Abraham.

Si mejingkat ngenda rusur idarami ras itenahken i bas ndungi sada-sada dahin. Tek kalak maka dungina nge dahin e alu sikap. Si erdahin alu mejingkat malem atena nggeluh, dengen maba kemalemen ate man keluarga ras jelma si enterem.